



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym tir_yimym

tir yimym TAPAK 8

Trump-i Putin dang rara tembangsü ashir

Australian Cricket Hall of Fame nung Clarke züngoksemogo



VOL. XXII ISSUE NO. 100 (ADOK 100) DIMAPUR ROGONÜ (FRIDAY) AENJETI (JANUARY) 24, 2025 ₹ 5.00

Chief Secretary-i AHOds/HoDs senden ayonger

Dimapur, Aenjeti/January 23 (TYO): Nagaland Chief Secretary, Dr. J. Alam ajanga Administrative Heads of Departments (AHOds) aser Heads of Departments (HoDs) pur senden ka Secretariat Conference Hall, Kohima nung January 27, 2025 anüingdang

11:00 ako nung ayongzüka lir. Iba senden nung '100 Days Campaign of all line departments for eliminating Tuberculosis by 2025' onük densema onük balala jembitsü. Anungji AHOds aser HoDs ajunga iba senden nung arua adentsü metetdaksür, ta sangdong ajanga ashi.

CM Rio-i Merenla Chuba asükhu lemsatep

Dimapur, Aenjeti/January 23 (TYO): Look East Construction Pvt. Ltd indang chairman L. Chuba Pongen kinungtsü Merenla Chuba mapang talangka shiranga arur January 23, 2025 nü Dimapur nung lar kidang asüba osang angashia jashir, ta Nagaland Chief Minister Neiphiu Rio-i sangdong ka nung ashi.

CM Rio ajanga ashi. Aseni meima aliba asütsü atema asenok kecha agia merenemtsür. Ajisüaka nai la kanga meima anepalua tajungtiba inyakogo, lai na nüngdakba mapang la den na liasü. La jangratema liogo ta angateta na temulung nung anisüngzük angutsü imlar, ta CM Rio ajanga asür Merenla kinungbo L. Chuba Pongen dang sangdong ka nung ashi.

Merenla Chuba ya temeim aketba, teyarir tajung, dangar dang aria bilemba aser Tsüngrem metetba tetsü, kinungtsü aser tetsü (grandmother) ka liasü. Lai lar tanurtem danga dangar dang aria bilemsü, meranga inyaksü aser ajemalutsü sayutet. Pa dak yimya tajung, menürem jakden liasü aser iba yongji la anasa alir dangi teti tepela bener arutsü, ta

Tang mangyimba mapang kü den ozü kibongi mangyimer kibong den asükhu lemsatep. Nenok den ozü sarasadem dena lir. Tulusang Tsüngremi nenok nem tesunepsüba agüjangma aser asür tanüla teti tatem maka tesunep nung anisüngzükjang, ta CM Rio ajangasa ashi.

HODs & awardees tem nem R Day indang metetdaksü

Dimapur, Aenjeti/January 23 (TYO): Kohima Deputy Commissioner Kumar Ramnikant-i sangdong ka ajanga, HOD aser awardees ajak dang 76buba Republic Day benjungmung atema

invitation cards/car passes Deputy Commissioner, Kohima office nung Establishment Branch nungi January 24 aser 25 nü office mapang agizüksü metetdaksüogo.

Finance Department ajanga CMLIS indang metetdaksür

Dimapur, Aenjeti/January 23 (TYO): Chief Minister's Life Insurance Scheme (CMLIS) kübok accidental insurance coverage teyari agütsütsü asoshi Finance Department ajanga District Level nung mapa nungloksüba sangdongogo.

Lendong atalokba tesem nung facility maliba mesüra yimsü balala mechi postmortem magitetsüsa kumra, district administration ajanga tataliba indang asüingdangya süa report agütsütsüla.

Per agi mechiba, gari lendong nung asüba, süngdong nungi tsükba, tzü nung arakseta asüba densema tia maka lendong ajurudang kibong mesür aser dependents indang nominees nem CMLIS agütsütsü asoshi teinyaksütem latetsüogo.

Nisung tasü mang ali nung remer ang osang District Administration tongra, sub-division indang charge bena aliba administrative officer ajanga kuli tejangja bushia osang agütsütsüla.

Postmortem report süra, iba report jaki peritsü aser claim nung aji adentsüla.

Kinunger temi mapang shidak nung osang agüja tasü mang marem lira, administrative officer-i verification agir report agütsütsüla, ta sangdong ajanga ashi.

NFHRCC aser Konyak Union senden amen



Dimapur, Aenjeti/January 23 (TYO): NFHRCC aser Konyak Union shisadokden senden ka KU Head Office, Mon Town nung January 23, 2025 nü mena liasü.

Konyak Union ajanga NFHRCC asoshi shisatsü tajung lemsatepba aser khuret abenba atema senden nung NFHRCC ajanga pelaba lemsatepa liasü.

nokdaksü lemtet.

Iba senden ya SASCI kübok Foot Hills Road tang teyangludak aliba, talisa Naganimora aser Tizit Division dak rangloker amen.

Senden nung telok anaprongi shilem tajung agia shisa lemsatepba sülen iba project matem tashi NFHRCC den Konyak Union nokdaksü

Konyak Union ajanga tekeratiba nung Tizit aser Naganimora Divisions kübok work orders ngur aliba firm ajunga jaoka NFHRCC den Implementation Agreement züluteptsü lemtet aser iba atema NFHRCC ajanga iba Agreement ya Konyak Union ket nung yutsü.

Aolemba Longkumer amokmerenba khukhua aitsür: AKM

Dimapur, Aenjeti/January 23 (TYO): Ministry of MSME kübok MSE-CDP scheme dak sendakba nung tawa NSCN/GPRN (Khang-Hokato Vusshe) ajanga Aor chanu aser kanga akumtsüboa aliba entrepreneur Aolemba Longkumer dak tenük yoker sangdong agütsüba atema kanga mepelar, ta Ao Kaketshir Mungdang (AKM) tir Lanutoshi Aier aser tongto zülur Satemmongba ajanga sangdong ka ajanga ashi.

adokdaksütsü merangba amai lir.

yoker amokmerenba mesüra merenshiba lira, onoki odangbo metoktsütsü aser tapet mera agitsü, ta AKM sangdong ajanga ashi.

Nübur inyakym balala nung ochishia alitsüji tim, saka Longkumer kisüing tenüing tetshiba ya nisung ka aser kin ka kisüing dak tenük yokba ama angateter, ta ashi.

NSCN/GPRN (Khang-Hokato Vusshe) indang yimya tamajungba akumer aser Naga nunger asoshi timtem agütsür ang akumer. Parnok inyakym ya tashiyim amshia senotsü meshiba den sako aser ibai Naga entrepreneurs aser shishilempar asoshi timtem tulu lir, shirnok region indang rongsenketzüing jenjang ajungkettsü meranga inyaker, ta AKM sangdong ajanga ashi.

Maneni iba ken o nung Government of Nagaland ola madokba aser kecha meinyakba süngmanger. Sorkar ya nüburtem kumzüka ayur ka ama telok balalai tim masüba mapa inyakba anema atsü-ayong mesüi mera agitsüla.

Iba ama inyaksangshi ya asaa nisung tejangja tenüing menükja nüburtem tsüingta mepetmesü

Telok mesüra faction shinga nema ozü nübur amokmeren mesüdaksütsü. Onok Aolemba Longkumer den lir, shiba takok balala anguba entrepreneurs aser Naga nunger lanur asoshi milentong ka lir, ta ashi.

Sorkari rule of law mamshitetra, state ketdangtsütsü metemsü. Anungji Aolemba ama lokti asoshi shilem tajung agirtem amokmerenba, tashiyim amshia senotsü mesüba aser merenshiba nungi kumzüka ayutsü atema sorkari nungi telangzüba akhanger, ta AKM sangdong ajanga ashi.

Tim masüba nung lenirtemi rongsen indokba meteta alitsüla: WSH

Dimapur, Aenjeti/January 23 (TYO): Status quo nung aibelena mangatetep aliba Kiyevi yim li nung ozüing alema tapi agi temelaba makai terenlok mapa inyakba asoshi aoksar aser khuret süa bilemer, ta Western Sumi Hoho (WSH) ajanga sangdong ka nung ashi.

ajanga ashi.

tapi agi terenlok mapa inyaker ta angazüka süngmanger, ta ashi.

Iba tesem nung status quo alitsü atema sorkari totuyuba agüja liaka Lamhainamdi settlement telung aser temeket nung terenlok mapa tanen makai inyakba ngua kanga meinpronger, ta sangdong

Iba status quo totuyuba nung Kiyevi yimtsüing nung alirtem dang pei lu nung aluyimba densema mapa kecha meinyaksü tenokdangba agüja lir. Saka Lamhainamdi nung alir temi tanen makai iba settlement telung aser temeket nung terenlok mapa inyaker, ta WSH ajanga ashi.

Asen lenir temi iba ama mapa inyakba ajanga tebilemsü tulu adokdaksür aser parnok tebilemba, Naga nunger sunepa ayutsü asoshi inyakba nung tasüingdangba arur.

Ano talisa Nagaland Home Minister, Y. Patton aser Minister, Parliamentary Affairs, K.G. Kenye densema aser teyari nung mangatetep aliba tesem nung

Anungji shidak bilemba aser anagatetba Naga nunger ajunga dang lenir aser minister temi mangatetep aliba tesem nung rongsen jenti indokba meteta alitsü ayongzüker, ta WSH sangdong ajangasa ashi.

ASÜ PILA SENTEP

Asür Mrs Merenla Chuba den asüpila sentep:

Anogo : January 24, 2025
Mapang : 1:00 PM
Tesem : Grace Mansion, Opposite IMC Hall, Supply Colony, Dimapur

Thonoknyu nung Khozaosie Hok-ah benjung tembangogo



January 22 nü Thonoknyu jila nung Khozaosie Hok-ah benjung amungba mapang MLA, P. Longon-i o jembiba noksa nung angur.

Dimapur, Aenjeti/January 23 (TYO): January 22 nü Thonoknyu jila nung Khozaosie Hok-ah benjung shibangba sentong MLA P. Longon-i moaja liasü.

Nagaland Deputy Chief Minister T.R Zeliang, shiba iba sentong asoshi alaketa jaoker liasü, pa mepaitoktetba maparen kar adokba ajanga medenteti liasü. Ajisüaka pai Khamniungan nungertem dangi osang ka yoka Khozaosie Hok-Ah benjung salem lemsatepba den pa medentetba atema sasaba lemsatepa liasü.

Pa indang osang nung T.R Zeliang-i ashiba agi, "Nagaland dang benjung lima ta ajaba ya shitak lir, kechiyong küm ka nung ita balala nung kin balala benjung kakabo amunger. Kin shia benjung ya tangar dang nungi balaka asür, koba putu aika mungyonga arudar.

"Tanü benjungtepba aser anisüngzüik benjung Khozaosie

Hok-Ah amungba mapang nenok ajaki iba benjung amungba chichia angateta amungtsü aser iba ajanga tesendaktep tajungba kuma yimjung aser tesunep bener arutsütsü imlaja atar," ta pai ashi.

Sentong nung o jembiba mapang MLA P. Longon-i, Khozaosie Hok-Ah ya benjungteptsüba aser anisüngzüiksüba mapang ka dang masü saka taitokteptsüba aser yimjung yangluba mapang ka lir ta ashi. Paisa, benjung shilemji nürburtem yongtsü nung telongjem adokdaksütsü asoshi lir ta shisem.

Sentong nung dena aliba kaketshirtem den jembiba mapang Longon-i, parnok dang taküm nung lenla ajak nung nendaka inyaksü ajungshiba den kija aser lokti nükjidong atongtsü atema shisaliok koda tongtibang iba indang lemsatepa liasü.

Modernization nung alima

den jangyumedema renloka aoba mapang Longon-i nürburtem dang sobaliba aser inyakyimtem dak tera yangloka alitsü mepeshia liasü.

Khozaosie Hok-Ah amungba mapang 4buba Handicraft festival-a mungogo, kong teka mapa balala sayaogo aser local artisan tem nem parnok mapa aser sempet sayatsü asoshi sabang tajung lapoktsüogo.

Benjung mapang tetoktepba balala ayongzüka asayaogo. Nie eiu Aking-e tetoktepba Mongshai-i akok aser tanabuba jenzang nung Shaniu liasü.

Ehloniu echan tetoktepba nung Chongpe mezüngbuba aser Thingpia tanabuba jenzang nung liasü. Viotsom ou tetoktepba Patsou-i akok aser pa sülen tanabuba jenzang nung Meehu liasü. Ein ship ou tetoktepba nung Patsou mezüngbuba aser Longon tanabuba liasü.

Education department-i 'PRAHARI Clubs' tentettsü tuyu

Dimapur, Aenjeti/January 23 (TYO): Sorkari tetuyua agütsüba dak ajemdaker Department of School Education-i Nagaland nung amenoka aliba Middle, High and Higher Secondary School (Government & Private) ajak dang, National Commission for Protection of Child Rights (NCPDR) and the Narcotics Control Bureau, Government of India-i yangluba "Joint Action Plan on Prevention of Drugs and Substance Abuse among Children and Illicit Trafficking" kübok Section 6 nung agüja aliba guidelines dak ajemdaker 'PRAHARI Clubs' (Exclusive Children's Club on "Awareness on Bad Effect of Drugs and Substance Abuse in Human Life") tentettsü tetuyuba

agütsüogo. 'PRAHARI Clubs' ya class 6 nungi 12 tsüngda alir kaketshir 20 nungi 25 tsüngda anisemer tesayur ka tawabangba kübok tenzüktettsü.

'PRAHARI Clubs' nem küm ka nung tapet inyakyim ana benoka inyaksü atema khuret agütsütsü aser club indang awareness inyakyim ya Ministry of Education (MoE) aser Ministry of Health & Family Welfare (MoHFW) indang tang aliba sentongtem den bendenloksütsü akok

Awareness balala agütsüba den club mapaji club züngsemtem ajak tanurtem temesepba mozü achiba mesüra temsepa mozü shibelentsü atema tanurtem amshiba aser school temeket nung temesepba

mozü achiba aser ayokba meita atatsü asoshi kümküma alitsü atema tangazükba agütsütsü asoshi lir.

Maneni 'PRAHARI Clubs' züngsemtemi, temesepba mozü achiba dak sendaka aliba inyakyim mesüra temulung melemi bilemba inyakyimtem indang teacher -in-charge nem metetdaksütsü, shibai maneni jenzang tapet agitsü atema school tekola nem metetdaksütsü.

School tekolaktemi "Joint Action Plan on Prevention of Drugs and Substance Abuse among Children and Illicit Trafficking" indang copy download sütettsü, koba DoSE Online Educational Services Portal (<https://dosenl.in>) nung inokja lir.



January 23 nü Raj Bhavan, Kohima nung Netaji Subhas Chandra Bose Jayanti mungogo, kong Nagaland Angh La Ganesan aser Governor's secretariat officers aser staff temi shilem agia liasü.

Niuland DC-i metetdaksür

Dimapur, Aenjeti/January 23 (TYO): Niuland Deputy Commissioner Sara S. Jamir-i, Niuland district nung Showuba nungi Ghotovi yimtsüng (Showuba connecting Guzunya-Pughoboto-Noklak-Pangsha) tashi Two-Lane lenmang yanglutsü aliba dak sendakba nung ajaki anidaksü atema yimtsüng, ali kibur aser nürburtem dang, built up/habitat area nung Right of Way (RoW) dimension ji 18 (Eighteen) meters aser nisung maliba tesem nung meter 24 asütsü

koba tang aliba lenmang teyong nungi anatsülen asütsü, ta metetdaksüogo.

Anungji ken o dak sendaka aliba yimtsüng aser ali kiburtem dang, ali fill up asüba, ki tasen yangluba (temporary aser permanent) aser RoW atsünga aruba amala inyakyim nungi pila alitsü tetuyuba agütsüogo.

Maneni 2023 küm May ita 31 nü sülen asüba kiojen tasentem atema temenok kecha magütsütsü ta kasa sangdong ajanga metetdaksüogo.

NBSE-i online meeting ayonger

Dimapur, Aenjeti/January 23 (TYO): Nagaland Board of School Education (NBSE) ajanga HSLC & HSSLC Examination 2025 indang Centre Superintendents ajunga dang online meeting ka January 28, 2025 nikongdang 1:00 ako nungi alitsü ta

metetdaksü.

Anungji nisung ajaki iba anogo aser mapang shidak nung iba senden nung adentsü ayongzüker. Iba meeting indang link ya Centre Superintendent WhatsApp group nung khen lir inoktsütsü, ta sangdong ajangasa ashi.

Shamator nung BBBP küm 10 ajungba amung

Dimapur, Aenjeti/January 23 (TYO): Beti Bachao Beti padhao (BBBP) tenzüker küm 10 ajunga anogomung January 22 nü Cultural Hall, Shamator Town nung mungogo.

Commissioner & Chairperson DLC Mission Shakti, Chuba Temjen-i o jembiba aser pai achaayanga tenangzüktepba agiba sentong agia liasü.

Iba sentong ya District Hub for empowerment of Women (DHEW), Shamator aser District Administration la longjemer ayongzüka liasü.

Kasa mapang nung iba anogomung nungdem nung "Aliberu Mongshi Khun" omen nung ajemdaker kiyong balala nungi tetsürtem ken tentepba toktepba sentong ka ayongzüka agiogo.

Sentong nung Deputy

Nagaland aser Manipur atema Indian Army recruitment ayonger

Dimapur, Aenjeti/January 23 (TYO): Agnipath scheme kübok recruiting year 2025-26 atema Agniveer ama kibong maküm aliba tebur candidate tem indang online applications agizüksü asoshi Indian Army renema lir.

nüngdaker koba tongteprateptsü atema Indian Army-i amshütsü.

Online registration ya February ita tenzüksü aser Nagaland aser Manipur kübok district ajak nungi lisopurtem jaoktsü. Agniveer tem atema recruitment ya shilem ana kuma lemsar agitsü.

Candidates tem nem exam centre atema choice pongu agütsütsü. Candidate temi online application nung Aadhaar number inoktsü nüngdaker aser Aadhaar aser mobile number link asütsü ajungshir. Pei category dak ajemdaker online CEE dak sendakba nung candidate tem practice sūdaksütsü atema "Join Indian Army" website nung link agütsütsü.

Mezüngbuba shilem nung state anaprongla nung centre kar shimer Online Computer Based Written Examination mesüra Common Entrance Examination (CEE) agitsü.

Candidate tem dang CEE magütsü tsüngda practice khenbosa asütsü metetdaksüogo. "How to Register" aser "How to Appear for online CEE" dak sendakba nung animated video tem www.joinindianarmy.nic.in nung angutsü. Educational qualification, physical/ medical standards aser mapa terasa www.joinindianarmy.nic.in nung angutsü.

Recruitment rally tanabuba shilem ya mezüngbuba shilem nung shimetba candidate tem atema asütsü. Rally atema tenüngdakba aser advisory tem Army Recruiting Office, Rangapahar-i metetdaksütsü.

Registration atema candidate temi www.joinindianarmy.nic.in i login süa parnok indang eligibility status reprangtetsü aser personal profile ka yanglutetsü. Application takok ngua benokba sülen candidate tem website nung link ka ajanga SBI portal kati aotsü tuyutsü. SBI portal nung candidate temi sen 250 den bank charge agütsütsü nüngdaker. Sen ya Debit/Credit cards, online banking mesüra UPI ajanga agütsütetsü. Maneni candidate tem ket nung active email & mobile number alitsü

Candidate temi online registration mapang category ana atema apply sütettsü. Category ka dak tali apply asüba candidate tem CEE ana nung shilem agitsü nüngdaker, kechiyong category shia tasüngdangba balala lir.

Army Recruitment Office, Rangapahar indang helpline numbers 03862-249012; 7628023484 aser email : swarkokila@nic.in asütsü. Candidate temisa www.joinindianarmy.nic.in ajanga ken o balala ashishitetsü.

Anentsüh lendong atema Centre nungi teyari mangur: Pinarayi Vijayan

New Delhi, January 23 (Agencies): Brihostibarnü Kerala Chief Minister, Pinarayi Vijayan-i, Wayanad nung anentsüh lendong nungi kümzükertem atema tanü tashi Centre sorkar nungi teyari mangur, ta metetdaksü.

Chief Minister's Disaster Relief Fund nung anguba sen lakh 712.98 ji lendong nungi kümzükertem yaritsü atema amshitsü, ta pai metetdaksü.

Vijayan-i, anentsüh lendong nungi kümzükertem yaritsü atema state-i mezüngbo Centre dang sen crore 2,221 agüjang, ta takhangba agüja liasü, ajisüaka Post Disaster Needs Assessment (PDNA) report sasep nungbo iba dang nungjagi teimba angutsü imlar, ta ashi.

"Centre sorkari Wayanad nung anentsüh lendong ya 'tzü-mopung lendong tulu' ta sangdongogo, anungji linük nung MP temi sen crore 1 tashi tenla agütsütetsü. Ni shidi ajanga linük nung MP tem ajak dang teyari meshiogo," ta pai metetdaksü.

Kerala Legislative Assembly nung Question Hour mapang UDF MLA, Kurukkoli Moideen-i, Wayanad nung

lendong atema senotsü teyari kwi angu?, ta asüngdanga liasü.

Ibaji langzüdang Vijayan-i, Centre nungi tanü tashi teyari mangur aser Chief Minister's Disaster Relief Fund nung anguba senji lendong nungi jenburtem yaritsü asoshi amshitsü aser kobi melii kiojen asentenshi mapa tenzüksü, ta metetdaksü.

Paisa, jila tasen tentetsü aliba tesemtem nung melinertem nem sen lakh terpongungu (15) agütsüsü, ta metetdaksü.

UDF opposition-isa, anentsüh lendong atalokba sülen ita trok jungogo, ajisüaka tang tashi iba lendong nung kanga mejungi yirurtem nem medical treatment agidang teindokba senotsü magütsür, anungji tekeraba nung teyari agütsüsüla, ta takhangba agütsü.

Opposition lenir, V D Satheesan-i asüngdanga langzüdang Vijayan-i, tekaraba nung item maparen ajak inyaksü, ta metetdaksü.

CM-isa, kiojen asentenshir yangertsü atema anogo 61 tsüngda ali agitsü atema state Cabinet-i telemetba agiogo, ta

metetdaksü.

"Iba project kübok ki aika asütsü. Kiojen asütsü atema sen lakh 30 shi indoktsü saka tang tashi nungbo telemetba junga magi," ta pai metetdaksü.

"Asentenshir yangershitsü atema sorkari department balalai amalitepa inyakdar. CMDRF, SDRF, sponsorships, CSR funds aser Centre nungi anguba senotsüji iba maparen atema amshitsü," ta pai metetdaksü.

Anentsüh lendong agi kongshirtem atema Kalpetta nung aliba Elstone Estate nung ali hectare 58 aser Wayanad kübok Nedumpala Estate nung ali hectare 48 nung jila tasen tentetsüsü, ta Chief Minister-isa metetdaksü.

Yaküm July ita nung Wayanad district kübok anentsüh lendong jagi yimtsüng tila ishika- Mundakkai, Chooralmala, Attamala aser Noolpuzha kanga mejungi kongshia liasü. Anepdang züngia anentsüh aluba lendong nung nisung aika asü.

Wayanad district nung nütsüng 8,17,000 shi lir. Iba district kübok Mundakkai yimbo meshimeshia samaja liasü.

Jan 26 nü Foreign Secretary Vikram Misri-i China semdangtsü

New Delhi, Aenjeti/January 23 (Agencies): Brihostibarnü Ministry of External Affairs (MEA)-i sangdong ka ajanga, foreign secretary, Vikram Misri-i January 26 anogo nungi tenzüka ananü China semdangtsü, ta metetdaksü.

MEA-i, January 26-27 anogotem nung foreign secretary-vice minister mechanism senden nung Misri adentsü, ta metetdaksü.

Iba senden ya India aser China na tsüngda yimtenren, rongsenkettzüng aser nüburtem tsüngda tesendaktep tajungba akümtsü atema lenirtemi tezüngzüktep agia aliba reprangshia asadangtsü atema lir, ta MEA-i metetdaksü.

Misri-isa China nung ketdangsertem den visa, linük ana tsüngda tayimtsü 'direct' senzüba, rongsenkettzüng tsütsü

amalitep aser arrtsülen tensa tajungba akümtsü atema jembitsü.

Hopta trok tejaklen National Security Adviser (NSA), Ajit Doval-ia China yimtiba, Beijing semdanga Chinese foreign minister Wang Yi den senden mena liasü.

Yaküm October 23 nü Kazan nung Ato kilonser Narendra Modi aser China Tir Xi Jinping na senden amenba mapang nung linük anati asentenshir Special Representatives (SR) senden mena arrtsü mangatettep ken otem jembitsü atema bangjema liasü.

Modi aser Xi na minute 50 shi senden amenba mapang nung Modi-i mangatettep ajak tim lenmang ajanga bentetsü aser arrtsülen aliba regions nung tesünep alitsüji kanga tongtibang, ta metetdakja liasü.

Jalgaon train lendong nung asür 13 nungi maitsü 8 bo jangjaogo



January 23, 2025 nü Jalgaon district nung train lendong nung yirur kati hospital nung treatment tagidak mapang osangbener ka den jembidang tangokba noksa nung angur.

New Delhi, January 23 (Agencies): Bodhbar nikongdang 5:00 ako meta Maharashtra state kübok Jalgaon nung atalokba train lendong nung asürtem 13 jungogo, aser iba nungjagi maitsü 8 bo jangjaogo, ta Brihostibarnü police-i metetdaksü.

Mumbai-i toudak mapang Pushpak Express train telung nung mi adokdar, ta olulu prokba sülen nisung kari 'emergency alarm chain' nung atsüba agi train ji ajungbena anen. Iba mapang nungji nisung kar tetsübu nung train nungjagi pungzüka aludang tejaklen aruba tanga train kati (Karnataka Express) tsükset.

Train telung nung mi adokdar, ta olulu proksangji train nung süngo ayoker ka liasü ta jangjaogo.

"Tasü mang 13 nungjagi tang tashi nung onoki maitsü 8 jagjaogo. Nisung anabo Aadhaar cards ajanga jangja," ta Special Inspector General of Police, Dattatraya Karale-i metetdaksü.

Central Circle nung Commissioner of Railway Safety, Manoj Arora-i iba tatalokba ya jungjunga bushisüngdangtsü. Brihostibarnü Maharashtra

Deputy Chief Minister, Ajit Pawar-i, Pushpak Express train telung nung süngo ayoker kati mi jangrudar ta olulu prokba ajanga iba lendong ya atalok, ta metetdaksü.

Olulu prokba sülen kari alarm chain nung atsüba ajanga Lucknow-Mumbai Pushpak Express nungjagi kar pungzüka aludang Bengaluru nungi Delhi-i aoba train kati parnok tsükset.

Pune nung osangbenertem den jembidang Ajit Pawar-i, "Pantry nungi süngo ayoker kati coach ka nung mi adokogo ta ayimdena liasü. Train nungji Uttar Pradesh kübok Shrivasti nungi passenger anati ibaji angashiba sülen tenatia iba osangji tangar nem metetdaksüba ajanga parnok indang general coach aser anasa aliba coach nung passenger tem kanga aoksatep," ta metetdaksü.

"Coach anaprongla nungjagi passenger kari tetsübu nung train nungjagi pungzüka alu. Passenger kati alarm chain nung atsü. Train anenba sülen nisung aika ayazüka aludang tejaklen arua aliba Karnataka Express train-i parnok menüngset," ta Pawar-i metetdaksü. "Iba tatalokba ya olulu prokba agi lir," ta deputy CM-isa shisem.

Kobi melii PM Modi-i US semdangtsü

New Delhi, January 23 (Agencies): Ato kilonser Narendra Modi-i US semdangtsü atema India aser US ketdangsertemi tongtepratepa jembidar, ajisüaka kodang semdangtsüar memetet.

Taküm Quad summit nung adentsü atema US Tir, Donald Trump-a India-i arutsü. Modi-i US semdangba mapang nung ang India nung Quad senden

kodang ayongzüksüar jangjatsüa akok, ta sorkar ketdangsertem osang ka ajanga metetdaksü.

Ato kilonser Modi aser Trump na tekeraba nung senden amentsü atema foreign minister S Jaishankar aser US secretary of state Marco Rubio nati jembishinüogo, ajisüaka tang tashi nungbo official osang kecha mali.

2017 küm Donald Trump Tir

asüba mapang nung Trump-i Modi US-i jaoka liasü. Iba kümjisa June ita nung Modi-i US semdang.

Taoba hopta Trump-i pa indang advisors dang, pai kobi melii India aser China na semdangner, ta lemsatepa liasü. Taruba ita France nung Artificial Intelligence (AI) Action Summit aliba mapang nung Trump aser Modi na ajurutsüa akok.



New Delhi, January 23, 2025: Brihostibarnü Parliament Central Hall nung Ato kilonser, Narendra Modi, Congress Tir, Mallikarjun Kharge, Defence Minister Rajnath Singh, Lok Sabha Speaker Om Birla aser tangartemi linük nüchiso atema rarar, Subhas Chandra Bose asoba anogomong nung asür nem akhüm agütsüba sülen tangokba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, JANUARY (AENJETI) 24, 2025

Mapa inyakba sayutsü maka na ?

Nagaland nung terenlok mapatem inyaktsü asoshi center government-i sen angati lezmüksüba dena magitetsüsa asenok state government aliba jenjang ya kanga tejashitsüka, tesasatsüka aser taaktsüka lir. Tangar state-tembo pei state nungi adokba, züsentetba aser inyaktetba nungi center government nem alimelen agütsür, iba jagi center government senpong melemtsür. Ajisüaka, asen state-bo asenok akaba aser inyaktetba nungi tagütsütsü kecha makaba dang masü saka center government-i lezmüksüba nungia agizüka magitetsüsa asenok government office nung amenba otsü ya tetamatsüka aser nübortem tenzüksü asoshi ita sen, gari, kiojen den kidang aser office nung teyaritepertem agütsüa malang, amajok nung tangar VIP jilu bena senzürtem ama dang kümogo. Aji oda, yakanü state government tenüng nung jembir aser kilonser Wb.K.G.Kenye-i metetdaksüba ama, Nagaland nung nübortem asoshi terenlok mapatem inyaktsü atema yokba sen shitak amshia mapa meinyakba ajanga sen crore 500 mangutsüsa akümtsüba Nagaland asoshi kanga takoksa, matong ali nung lepdok amai asütsü. Tanü putu nung yabo, akhi asenok ochimashiba putu amato masü, mapa meinyakra sen mangur aser meyoker. Aji oda, akhi asenoki tiyazü bill yanglua sen agizükba putu amato masü, tanübo mapa shitak inyaktsüla, kechiyong asen state nung mapa shitak inyak meinyakbaji pi tebangeri anüng nungi repranger, anungji meinyak ser inyakogo ta ashitsüba tasak. Aji oda, tangaribo asenok kecha makayonga, mapa dang shitak inyakra, asenok nüngdak asoshi sen peria agütsütsü mulunga lir. Ibayongji, asenoki mapang shia Delhi nung alir yimsüsürtemi nübortem asoshi terenlok mapa inyaktsü asoshi sen peria dang lir ta metetdaksüpet metetdaksüba asenoki angashir. Iba ama tangari asenok nem asenok agitsü inyaktsü atema sen angati agütsüner saka asenok azümasen dang masü kangasa ochimashiba agi asenoki tangari angati agütsüba senji agizüka magitet timatemer aser akoksar. Atangji, tanü putu yabo, akhi asenok meinyak ser sen agizüka agiba putu to masü, saka mapa shitak inyaka renemteter nem dang sen agütsüba putu lir. Aji oda, school azüngertema, akhi putu nung tamakok angur kaketshir yariba putu amato masü saka takok angurtemang yariba aser tajungba purtemang ajungkettsüba putu lir, kechiyong tajung pur yarir meyari aliba putu nung tamajung pur yaritsüba nüngdak madoker. Iba kasaji, terenlok mapa inyakbaren nunga koba state-isa center nungi agütsüba sen amshia mapa shitak renemer sayuteter, item state-tem nemji dang tanüngba sen dang masü saka ano talila dena agütsür. Ajisüaka, asenok ama state nung, tatishitsü agi, mozü ki ka asütsüba sen lezmüksü ser nung mozü kiji meyanglura aser yanglu tenzükyonga merenemtetra, center-i iba mozü ki asütsü yanglutsü lezmüksüba senji magütsütsü. Kasaji, lenmang yangluba nunga state government-i lenmangji mapang shitak nung merenemtetra, center-i sen lezmükja alibaji mangutsü. Iba amaji asenok ya alima nung sen makaba agi masü saka asenoki mapa meinyak ser sen agizüka chinüba agi senji magizüktet timatemerba dang lir. Shin o nung ashi ama, taküm nung yimya tejen melenshitsü tasak, iba jagi akhidang mapa meinyak ser tiyazü sen agizüka agibaba aser ochimashi yimya nung dang lia arubaba taküm yimya memelenshitet, tanüa akhi ama mapa meinyak ser sen agizüka agitsüsa bilemba agi asenok akoksar. Joko, asenoki akhidang mapa meinyak ser agizüka takar kuma aliba anogo aser mapangtem to pongmang ama ka dang bilemtsüla aser tanü mapa inyaker külenang sen agizüka agitetba putu ya-ang asangsang ama bilema asenok jakla yimya melenshitsüla aser temulung meyipa o aser mapa nung ochishia alitsüla. Idangji dang asenoki tangari agütsüba senotsüa shitak amshia asenok tajangzük angutsüsa mapa shitak inyaktettsü aser asenoki asenoksasa asenok perir anüngtsüsa asen lima nung rongsen yanglutettsü.

OLEMSABANG

AROGO SAKSALEMTSÜ YIMYIM

- Meyu Changkiri

(Yashi adok nungi...)

Asenoki Kong Aibelen?

Amangbapur rong nung pei ajunglen Temeshi Laishiba rateta amshidang Tsüngrem O tashi ajema kümdaktsür. Hosea ajanga Tsüngremi yamai ashi, Shisatsü anüngba yong kü nübur samar; nai shisatsü magizük nungji, ni asoshi na putir mesüdaktsütsü. Ne Tsüngrem ozüng nai amadok nungji, nia ne chirtem amadoktsü (Hosea 4:6). Temeshi Laishibaji amangbapur ajak asoshi memelenshiba tamang aser taküm libaliro tamendakdak. Iba ya arogoi akang akanga bendanga agizüktsüla. Saka aikati pei taküm meshiteta alitsü melena rongsen tajangzük, temulung meyiptsü melena pei molungba inyakba, jurila ajangzüktsü asoshi tai tesayubatem dangi meyipba angur. Item jagi tamangba nung zübazülemba, pei arogo anema jembiba, Tsüngrem anema inyakba aser tanela nung rajang akümtsüsa lemang sadema lapoktsür.

Chichiba tanela nung aintsü melena arogo sentong balala züinba, nütsungsüba dang nungi arogo kiojen tali bendenloker. Tsürapur Khristan akümba agi Khristan akümba masü saka nütsungsüba nung shilem agitsü asoshi Yisu Khristai nütsüngtem jatet, aser nütsungsüba nung shilem agitsü mela (Mati 28:19-20). Nütsungsüba ya metetsümonga anidakba, Khrista nütsüng akümtsü tesayuba agütsüba, tajungleni ajungmesoba, aser tanela nung indaktsüba tenyaba mapa ka lir. Nütsungsüba nung shilem agir asü, mesüra tema tazütsü maparen ka dang inyaker? Item tasüngdangba ya asen sasa asüngdangtsüla. Nütsüng ka taküm kaji tanen maka ainba, angazükba aser tajungba leni melenshiba ajanga sayur. Arogotemi mapang ajak nung arogo sentongtem tendanga reprangshitsüla, aser chichiba tamang nung aintsüsa tesendaktep tajungba akümtsü tuyutsüla.

Tenzüksü melen aiben lenirtem menden ya tenüng tulu aser tamaren tashi amshiba menden ka ama kümdaktsür. Yisui ashi, Saka nenok rongnungbo yamaji malitsü; saka nenok rongnung shibai tulu kümnür, pa nenok tenzüker asütsü (Mark 10:43). Chichiba lenir kaji ajemaluba, aria bilemba, aser mulungsoa tangar tama kümdaktsüba ajanga sayur. Khristai sayuba ama kilir mulungsentsü lenisüba yimya bushiteta inyaktsü kanga dang nüngdaka kümogo. Tangari metettsüsa, tiaksanga pei sasa uluba ajanga shidakba tenzükba tetezüji samadaktsür. Lenirtemi kodang tenzükba nükjidong nungi pilaa pei inyakba mapatem shisanga temaba jenjang aser pei ajangzüktsü asoshi inyakdir, idangji Tsüngrem tenzükba asoshi tai tangatetba ka adokdaktsür.

Iba den külemi, alima tenükshitsü aser menden raktepba shisatsü arogo telungi aitadokogo. Tanu putu nung joko süngzük süngzüka kaa ita alitsü tesayubatem aika arogotem nung aitadokogo. Item tesayuba ajanga pei kangki apur anogo shia Khrista sülen anidaktsü tangatetba nungi pilaa amangbapur anisadaktsütsü temeni meranger. Temeshiba, ajemaluba, aser bendanga tenzükba melena rongsen, tenüngsang, aser anisüngzük bushiba tangatetbatemji arogoi nokdangtsüla.

Tamendakdak Dangi Meyipba

Chichiba temelenshi adokba tamendakdakji Khrista temeim nungi tenzüker. Tenyartem Mapa 2:42-47 nung mezüng arogo tatishitsü nungi tangazüktsü tajung aika angur. Parnoki tesayuba nung temulung agütsü, telongjem, sarasadem, kati ka yaritepba nung tashi ita liasu. Item arogo sobalibatemi kodang Khrista dak amenlokdir, idangji tanela nung tashi ita amangapur longjemdaktsür. Iba tangatetba nung joko amangbapurtem meyiptsüla, aser tama tereprangtsü melena chichiba tanela nung aintsü apusotsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir



Frontline Ministry ajanga Anitet Baptist Arogo, Murise nung Mother Heart Skool, January 15-19, 2025 anogotem agia liasü. Iba sentong nung MHS Director Rev. Dr. Toshi Langu, tesayur Dr. Bendangyapangla Changkiri aser Limala Pongen liasü. Parnok ajak agi tetsü 27 Mother Heart Skool nung graduate asü.

Africa aser Asia nung Khristan nütsüng kanga renlok

January 23, 2025: Yaküm alima nung Khristan nütsüng kanga renlokba region ji global south liasü, talisa Africa aser Asia nung Khristan nütsüng kanga kera renlok, ta Center for the Study of Global Christianity, Gordon-Conwell Theological Seminary-i metetdaksü. Kasa report ajanga, 2050 küm tashi nungbo Asia aser Latin America na (senteper) nung aliba Khristan nütsüng dang nungi Africa nung aliba Khristan nütsüng teimba asütsü. Tang alima nung Khristan nütsüng billion 2.52 aliba nungi billion 2.63 akümtsü aser ibaji shilem 1.08 ainba lir; 2050 küm tashi nungbo alima nung Khristan nütsüng billion 3 dak tali akümtsü imlar, ta kasa report ajanga metetdaksü. Khristantemsa süaka denomination kar kanga kera renloker. Nütsüng kanga kera renlokba denominations rongnung Protestants (shilem 1.63), independents (shilem

1.96), evangelicals (shilem 1.66) aser Pentecostal/charismatics (shilem 1.48) liasü. Alima nung Khristan nütsüng kanga kera ainba region ji global south liasü, talisa Africa aser Asia na nung kanga kera renlok. Aso 20buba nung ayaokdang Africa nung Khristan nütsüng million 10-a majung liasü saka tangbo Africa nung Khristan nütsüng million 734 dak tali lir. 2050 küm tashi nungbo Asia aser Latin America na nung aliba Khristan nütsüng senteper Africa nung aliba Khristan nütsüng matoksatsü, ta asadangteter. 1900 küm alima nung Khristan nütsüng shilem 95 bo Khristan nütsüng teimba aliba linüktem nung liasü, ajisüaka tangbo alima tesem aika nung Khristan nütsüng lir. Ano külen 1970 küm alima nung Tsüngrem dak mamanger nütsüng million 165 liasü saka Tsüngrem dak mamanger

nütsüng tajemba kümдар. 2020 küm Tsüngrem dak mamanger nütsüng million 147 liasü aser 2024 küm tashi nungbo alima nung Tsüngrem dak mamanger nütsüng million 146 dang kümogo. Ano Tsüngrem lir asü maliar mejangjaba nütsüng-a ajema kümдар. 2050 küm tashi nungbo parnok nütsüng million 849 dak nungi ishiba asütsü, ta asadangteter. Tesüiba küm 100 tsüngda alima nung Arogo terben agi tali renlokogo. 2024 küm tashi nung alima nung Arogo million 4.2 shi liasü. 1900 küm alima nung missionary 62,000 liasü saka 2024 küm tashi nungbo missionary 445,000 liasü. 2050 küm tashi nungbo missionary 600,000 alitsü. 1900 küm alima nung nütsüng shilem 54.3-i Khrista osangtajung mangashii liasü saka 2024 küm tashi nungbo Khrista osangtajung mangashiba nütsüng shilem 27.8 dang kümogo.

ANO GO ABEN TSÜNGREM DEN

CHIRNUR SAYUTET?

Tanur ka pei aotsüba lenmang nungji sayutetang; aser pai tain akümdang iba nu ang iba nungi mepilatsü. ~ Apijemtsü 22:6 Tezüluba tatsüka züluba nung oshi balala inoka tali angatetsü asoshi zülusemer. "Sayutetang" ta asuba ya English nung "train" Hebrew o nung "chanak" tetezi, "first", "to put something into the mouth." "to give to be asüdang nungi tsüraburi anebalur, Tetsü-pok nungi tanur ka tasted". Temoatsü kaji asen kibong nung chirnur tila sayutetsübaji koda temoatsü aser koda nüngdak. Tanur kini sungi sayutsübaji mezüng mapa lir aser sayutsübaji tetenzükdak lir. Alemli nungi asen tets-teboutenbumbia arba kali Alcaburji tenüki anguba aser tanabuba Tsüngrem. Kasa oji tsürabu:]-3, nungtanurtemi tsürabur dang tashi angatsü aser Parnoki Tsüngrem ozüng sayuba ajak tashi angaa pagazüktsüba aser itemji benshitsü shia lir. Yagi tebu aser tets? ka teinyaktsü shilemji ulura lir ta tejangja sayur. Tanur kaji temeim agi tila asüdang nungi azüoka, pa/la kongi aotsa aser koda jembitsü itemji sayua anitettsüla. Taküm nung kechi ajurudir aruaka itemji agizüktettsüsa sayua anitettsi kanga tongtipang. Tila mapang kechi inoktsür ibaji tanur tain aküm dang amshiyonga aotsüba lir. Tanü alima lenirtem majungba jembir, nübor majungbatem jembir aser loktiliba raksaba jembir, saka kibong nung tsüraburi koba shilem agia lir reprangshitsüla. Kija shiaji kibong ka nungiang atok aser kibongiang lokti ka akümer. Tanü tesayuba shitak mapa agi sayutetba tsürabur aser kibong nüngdaker.

Iran nung Khristantem jail nung puokba kümsük teimba kümtsüogo

January 23, 2025: Iran linük nungbo Khristantem inyakba mapatemji ozüng alema inyakba mapatem ama züngshir; iba linük nung Khristan yimsü amangertem ajema kümdaktsütsü nükjidong nung Iran nung Khristantem tepuokdak ayuba kümsük teimba kümtsür, ta melungtet telok Article 18-i metetdaksü. 2023 küm den medemdangra 2024 küm Iran nung Islamic court temi Khristantem tepuokdak ayutsü kümsük lemsüktsübaji trokben agi teimba liasü. Iran nung aliba court temi 2024 küm linük nung Khristan 96 aija tepuokdak ayutsü obendang agütsüba kümsükji ajak senteper küm 263 liasü. 2023 küm nungbo Khristan 22 aija jail nung puoktsü obendang agütsüba kümsükji ajak senteper küm 43 dang liasü, ta Hombarnü (January 20) Article 18-i metetdaksü. Article 18 indang "The Tip of Iceberg" ta ajaba report nung shia aliba agi, küm teimba tepuokdak ayutsü obendang agütsübaji talisa 2023 küm

house churches mita aoba mapang nung mezüng Khristan pongu kümsük aika tepuokdak ayutsü obendang agütsüba nungi tenzüka liasü. Islam yimsü toktsür Khristan yimsü agizüker nisung pezü küm terer (10) tepuokdak ayutsü obendang agütsü. Parnoki missionary tem mapa inyak aser linük security raksatsütsüsa inyakogo, ta tai tonglokja liasü. Ano tanungba Khristan ka jagi linük security anema inyaker aser Zionist Christianity ajungkettsür, ta aija küm 15 tepuokdak ayutsü obendang agüja liasü. Yimsü dak sendakba nung yaküm Iran nung Khristan 139 apu. Arlla 500 kübok parnok aija kümsük aika tepuokdak ayutsü obendang agütsü. 2021 küm yanglushiba ozüng kübok aibelenertem jail nung kümsük tali puoktsü lateta liasü. Iran nung court temisa Arogo jenjang raksatsütsü atema ken o balala nung senchi dollar sen 800,000 jungnüa chiogo, ta kasa report nung shia lir. Article 18-i, Iran nung yimsü

temeden anema inyakbaji ajaki meteta lir, ajisüaka Iran nung yimsü temeden anema inyakbaji nisungtemi bilemba dang nungibo jenjang tamajungba lir, ta metetdaksü. Article 18 den tanga advocacy telok balalai 2008 nungi 2023 küm tashi nung Iran nung court tem nung ken o million 3 dak tali aliba asadanga iba report ya renem. Iba ken o files ji 2024 küm "hactivist" group Edalat-e Ali-i sangdonga liasü. Iba report nung yimsü dak sendakba nung Khristantem anema benokba file 300 dak tali densema lir. Osangbener den jembidang Article 18 nung News Director, Steve Dew Jones-i, "Onoki küm aika jembia aruba kuliji ibai lir," ta metetdaksü. Iran sorkaribo alima tsüngdang tenüng tajung agitsü atema parnoki Khristantem anema meinyaker ta ashir, ajisüaka tawa judicial files kakteta asadanga ajanga iba linük nung sorkari Khristantem anema inyakba jangjar. Tan Hokolbarnü (January

24) Geneva nung U.N Universal Periodic Review of human rights senden aliba mapang nung Iran sorkar dang linük nung meimchir temeden balala kümsüktsü atema ajungshitsü, ta Dew-Jones-i metetdaksü. "Parnoki tamangba yimsü temeden atema jembir. Süra Tenla ki kwi lapoka lir aser yimsü dak sendakba nung shinga tepuokdak mali asü?" ta Dew-Jones-i ashi. Iran nung talisa Islam yimsü toktsür Khristan yimsü agizükertem reshikangshir. Islamic Revolutionary Guard Corps-i Khristantem rongsen, Khristan pusemer lawyer tem aser bendang linüktem nungi Khristantem senotsü teyari anguba bushisüngdang tenzükogo. "Bendanglen nungi senotsü teyari angur, ta melung melemita ana tsüngda yimti pongu nungbo Khristantem pua IRGC agent temi asüngdangyaogo. Islamic Penal Code (IPC) kübok Arlla 500 nung ajemdaker aitsütsü, ta Khristantem amokmerener.

Iba Arlla kübok aibelenertem küm 10 tashi tepuokdak ayutsü akok," ta report nung shia lir. IRGC-i amokmerenba ama yaküm Khristantem anema benokba ken otem shilem 70 bo Arlla 500 kübok aitsüba ken otem liasü. "Khristan yimsü renlokba nokdangtsü nükjidong nung Iran sorkari Khristantem sendoktsü aser Khristantem rongsenkettzüng jenjang raksatsütsü atema inyaker ama reprangteter," ta Article 18 report ajangasa metetdaksü. "2024 küm ken o ana nungbo obendangertem IPC nung Arlla 500 amshia Khristantem meyong kiojen aser garitem rakzükogo," ta report nung shia lir. Alima nung Khristantem atema linük tamajungtiba 50 rongnung Iran ya jenjang 9buba nung lir (Open Doors' 2025 World Watch List). Open Doors report ajanga, Iran nung Khristantem reshikangshiyonga iba linük nung Arogo maneni ainer, ta metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Tebhong

(n) telang, aika ka küma alenba (bundle)

* Lanurtemi tambusanger nem süng tebhong kaka bentsü.

Tebilemba

(n) temulung nung asadanga apidangba (thought, opinion)

* Senden nung nisung shia tebilemba balala bener adenshir.

OLONG PAITEP # 7044

Grid for crossword puzzle #7044 with numbers 1-17.

TIPLIN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S_ _ _ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong talemangliba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 7043 TELANGZÜBA

TIPLIN :

- 1. Tanga, 6. Wara, 7. Rajang,
9. Anük, 10. Jenjang,
11. Alar, 14. Ngashi, 15. Nala,
16. Mechi.

LANGTSÜNGLEN :

- 2. Anga, 3. Yabang, 4. Tarok,
5. Orak, 8. Ainer, 9. Anema,
10. Jabili, 11. Among, 12. Miim,
13. Anem.

NAI-A YA METETTER MA

Arishi küm 10 tain India tsür Atiqa Mir ya linük nungi tetsürtem rongnung mezüngbuba World Series Karting (WSK) Championships nung tokteptsü lir. La ya Babyrace den season tepeyong atema tenangzüktepba



yangluogo. South Italy nung La Conca circuit nung test session ka nung kanga junga shilem agiba sülen shimogo. Jammu and Kashmir nungi racer ya iba Mini class race nung tetsür la kija asütsü. La taküm WSK Super Master Series, WSK Euro Series aser WSK Final Cup ta WSK Championships asemprongla nung asayatsü.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Manipur: R Day atongtsü lia police-i prangbong injang ngutetogo



Imphal, Aenjeti/January 23

(Agencies): Republic Day amungtsü lia Brehostibarn anepdang central aser state police force tem longjemer manipur kübok Kakching district nung chang metsüba tesem ka meita ao liasü.

Meita aoba mapang sepaitemi ozüng alema shibelenba prangbong injang tem ngutetogo, koba

telungpurtemi ozüng alema maparen balala inyaksangshiba dak sendaka alitsü ta temulung meleme bilemer.

Itangitertemi osang tejangja ka agütsüba sülen BSF personnel aser Kakching district police nungi commando temi iba tesem maita aoa liasü. Wabagai yimtsüng kübok chang metsüba tesem ka anepdang 6 ako nungi meita ao tenzük aser 8:30 ako

nung tembanga liasü.

Sepaitem apuba prangbong injangtem rongnung rifle ka den magazine ka, detonator medeni grenade pezü, INSAS aser AK rifles injng pezüzü aser tear smoke grenades aser shells tem densema liasü.

Sepaitemi apuba prangbong injangtem ya ken o dak sendaka aliba police station nem bendanga agütsüogo aser ken o ka benokogo.

Telungpur telok balalai Republic Day nung shilem magitsü ayongzüker aliba mapang iba anogo ya kecha tetsükdaksü makai takok nung amungtsü atema iba meita aoba sentong ya ayonzüka agia liasü.

2024 küm October ita-a security force temi kasa tesem nung prangbong aser injang aika nguteta liasü.

Terenlok asoshi VC, LC nüngdaker: Mizoram CM

Aizawl, Aenjeti/January 23

(Agencies): Mizoram chief minister aser Zoram People's Movement (ZPM) lenir Lalduhoma-i Bodhbarnü ashiba agi, sorkari terenlok asoshi sorkar den inyaktetba Village Council (VC) aser Local Council (LC) nüngdaker.

Mizoram kübok district teku nung VC 544 aser Aizawl Municipal Corporation (AMC) aser Lunglei Municipal Council (LMC) kübok LC 111 atema election February 12 nü agitsü.

Central Mizoram, Serchhip district kübok Thenzawl block atema party candidate tem sangdongba mapang Lalduhoma-i ashiba agi, VC aser LC kobasa opposition party tem aziöker lir item VC aser LC tem yagi sorkar scheme aser facility tem aiben tonga maoer, kechiyong opposition temi sorkar den longjemer inyaksü memulunger.

Iba ajanga item amala VC aser LC tem terenlok nungi atsüngzüka aoer, ta pai ashi.

CM-isa, state kübok tesem

balala nung aliba ZPM worker tem dang taruba civic polls nung party candidate tem temulung ajak agi bendanga agüja yaritsü mepeshia liasü.

VC aser LC election atema vote ya February 12 nü aonung 7 ako mesüra vote agütsüba tembangli nungi tenzüka azüngtsü.

State Election Commission (SEC)-i nomination file asütsü atema tatembangbuba anogoji January 23 nü ta latettsüogo aser candidate temi January 27 nü tashi nung parnok candidatures agintettsü.

Nomination paper tem ya January 24 nü kanga junga asadangtsü.

SEC-i ashiba agi, VC 544 nung menden 2,416 lir aser item rongnungi menden 613 tetsür atema mekazüka tokja lir.

Kasa mapang nung AMC aser LMC kübok LC 11 nung menden 723 lir aser menden 195 tetsürtem atema mekazükja lir.

VC 544 nung tetsür 2,22,098 densema voter 4,37,708 lir aser AMC kübok LC 87 nung voter

2,44,726 aser LMC kübok LC 24 nung voter 41,206 lir.

Kasa mapang nung SEC-i, VC aser LC agitsü aliba district teku nung Superintendent of Police tem dang social media nung osang teyazü prokshia alibatem bushisüngdangtsü tetuyuba agütsüogo.

SEC-i ashiba agi, AAY aser BPL kibongtem nungi candidate tem taruba election nung tokteptsü temsüa mali ta social media nung osang prongshiba ya teyazü lir.

Kasa osang ajangasa AAY aser BPL kibongtem nungi candidate temi tashishiba benokba SEC magizüksü ta shia lir, ta kasa sangdong ajanga metetdaksü.

Cimmission-i iba ken o ya süoki ia agir aser district teku nung SP tem dang ken o ya bushisüngdangtsü mepeshir, ta SCE-i metetdaksü.

SEC-i ashiba agi, VC aser LC eletion nung tokteptsü atema candidate ka asoshi qualification mesüra eligibility criteria ka atakzükja mali.

Manipur nung Myanmar nunger ana apu

Imphal, Aenjeti/January 23

(Agencies): Myanmar nungi Rohingya nunger apuani na arrtsü nung aliba Moreh jila nung taoba küm asem tashi maittsü miimshia lia aliba puteta Imphal nung okadak kati anir oa liasü.

Ketdangsurtemi ashiba agi, Court of Chief Judicial Magistrate Imphal West-i Bodhbarnü Rohingya nunger apuani na ya kuli kaket tapet mebeni Manipur nung aliba atema aitsüogo.

Myanmar kübok Maungsawat state nungi Serajun Salam'er jabaso Zeyabur Rahman (37) aser pa kinungtsü Fatiam Begum (35) na police-i pua liasü.

Singjamei police station nung pua aliba Rohingya nunger ka indang ashishia aruba sülen tena

ya pua liasü.

Okadaki anir aoba sülen tena ya Foreigners Act Section 14 (C) kübok aitsüogo.

Summary trial atema parnok anema benokba charge sheet nung tena ya Rohingya Muslims nunger aser Myanmar nung military-i parnok anema jenjang agiba sülen Bangladesh-i jena oa liasü, ta shia lir.

Tena Myanmar nung refugee camp ka nung ita ishika ali aser iba sülen Kolkata-i (West Bengal) ao.

Kolkata nungi tena Hyderabad-i ao aser UN refugee agency Hyderabad branch ajanga UNHCR identity card yanglua laisü.

UNHCR card ya bener par kibong Moreh-i aru, kong parnok küm asem tashi lia liasü.

Okadak ken o angadanga mapang, Protected Area Permit kübok pass agütsüba ka mebeni bendangertem Manipur nung melitettsü ta tena dang shiogo.

Foreigner Act nung aibelenba atema aitsüba sülen okadaki tena ya Manipur nung refugee detention center ka nung sota ayutsü atema police nem temelaba agütsüogo aser tenaprongla dang senchi sen meyrejang anana chia liasü.

Iba den bendenloksema airport authorities-i Bodhbarnü Imphal nung Zeyabur Rahman'er arishi küm 16 tain jabaso Md Anash puogo.

Asanguba ya Imphal West district nung Takyel Boys Observation Home nung anogo 15 ayutsü atema yokogo.

Trump-i Putin dang rara tembangtsü ashir

Washington, Aenjeti/January 23 (Agencies): Vladimir Putin-i Ukraine nung raraba tatem kati marudaktsüetra Russia dang tariffs tali meshitsü aser tenokdangba tali agütsütsü, ta Donald Trump-i tekumdangtsü shiogo.

Pa indang social media sapang Truth Social nung pai iba rara tangatettep nung anentsü merangba ya Russia aser par tir asoshi mapa tajung inyaktür, ta Trump-i ashi.

Taoba mapanga Trump-i February 2022 nungi tenzüka Russia-i tashi ajak amshia amakba rara ya anogo ka nung tembangtsüsa jembishinütsü ta shia liasü.

Russia-i iba onük nung telangzüba agüja mali, saka ketdangsur temi US administration tasenba den jembishinütsü asoshi Moscow atema maangka tilaka lir ta shia lir.

Putin-i iba rara tatem kati

arutsü asoshi jembishinütsü renema lir ta aiben shiogo, koba 2014 nung mezüng tenzük, saka Russia-i litsülika agiba asangsang nung Ukraine-i agizüktsüla, koba tang par li shilem 20 shi lir. Paisa Ukraine ya NATO nung adentsü memulunger, koba anüolen linüktem indang military alliance lir.

Kyiv-i par litsülika magütsüner, saka Tir Volodymyr Zelensky-ibo tang Russia-i amokbanga aliba tesem kar khen atema agütsütsüsa akumtsü ta shia liasü.

Mongulbarnü osangbener senden ka nung jembidang Trump-i Putin den yakta jembitsü aser Russia leniri yimjung ken o jembitsü memulungra tenokdangba tali agütsütsü akok ta shia liasü.

Saka tsüng Truth Social nung "Rongsenketzüng mejungi aliba Russia aser Tir Putin atema mapa tajung ka

inyaktüsü," ta zülua liasü.

"Tangsa angatettepang, aser iba temenünütsü rara anenang! Ibai tamajungba dang akumtsü. Asenoki 'deal' ka meyanglura, aser yakta, Russia-i United States aser danga linüktem dang ayokba kechiserna ajunga nung Taxes, Tariffs tali meshitsü aser tenokdangba agütsütsü."

"Ni Tir asü asübo kodanga metenzüktsü aliba rara ya temdaktsüti! Asenoki ibai lenmang temelaba mesüra tasakba nung inyaktetsü, aser lenmang temelabaji teti tajungba. Tezüngzüktep yanglutsü mapang tongogo," ta US Tir Trump-isa zülua liasü.

Trump indang taoba special representative for Ukraine, Kurt Volker-i ashiba agi, Trump-i Russia nem tenokdangba tali agütsütsü amokmerenba tetetzü Vladimir Putin dang tensa tajungba masü tamajungba akumtsü ta sayur.

Linük ayameso masüadang rara anentsü asoshi tezüngzüktep nung Trump-i kechi aginer aji Kremlin-i metettsüla, ta Russia indang deputy UN ambassador Dmitry Polyanskiy-ia shia lir.

Israel-i Jenin nung maneni meita aor

Jenin, Aenjeti/January 23 (Agencies): Israel-i anogo asem buba Jenin meita oa sepaitemi iba yimti refugee camp nung alir dang tashiyim agi ainshidaktsütsü amokmeren.

Jenin refugee camp nung aliba Palestine nunger noklang aika Brehostibarnü nungi pei ki yutsür ainshi tenzükogo.

"Israel army temi drones aser mitkar indang gari nung loudspeakers amshia camp nungi ainshitsü totuyuba agütsür, kong Israel indang mitkari tan hopta military operation tenzüka lir," ta Jenin governor Kamal Abu al-Rub-i osangbener dang ashi.

Ano Burqin nunga Israel sepaitemi Bodhbar aonung amakdang Palestine nunger tebur ana tepseta Jenin governorate nung kanga sashia meita ao tenzüker mezüng anogo ana tsüngta asür nisung 12 jungogo.

Ibai Palestinian occupied territory nung Israel indang Iron Wall campaign nung shilem ka lir, koba Gaza nung ceasefire tenzüker anogo ka lir tenzük.

Occupation forces den ghonda ishika khatepba nung Muhammad Abu al-Asaad aser Qutaiba al-Shalabi tepset, ta Palestinian news network Al Quds Today ajanga ashi.

Israel mitkaria nisung tepsetba indang Brehostibarnü shiogo aser tena ya Palestinian Islamic Jihad den sendaktepa liasü aser ita tetenzüklen Qalqilya governorate kübok Funduq yimtsüng nung Israel nunger asem tepseter trok yirutsüba atema bushia liasü ta ashi.

Ajisüaka Palestinian armed group Hamas indang military wing al-Qassam Brigades-i nisung ana ya Hamas züngsem lir ta ashi.

Israel sepaitemi tena tasü mang ya agütsütsü memulunger, ta Palestinian General Authority of Civil Affairs ajanga ashir.

Palestinian news agency Wafa ajanga ashiba agi, Israel sepaitemi Burqin nung ki ka lungbanger injang aser missiles khaloktsü aser bulldozer ajanga makepsatsü.

Bodhbarnü Defence for Children International Palestine (DCIP) ajanga ashiba agi, Israel sepaitemi arishi küm 16 tain Motaz Imad Mousa Abu Tabeekh khaset.

Israel sepaitemi iba territory nung Bodhbar nikongdang aser Brehostibarnep Palestine nunger nisung 22 apu, ta tepuokdak aliba telok ana, Commission of Detainees and Ex-Detainees Affairs aser Palestinian Prisoner's Society ajanga ashi.

Los Angeles nung morok mi tasen jangrua lir

Los Angeles, Aenjeti/January 23 (Agencies): Los Angeles north tsütsü tenemlen morok mi tasen jangrua süngdong aser arem tasazük 21 square kilometres shi kanga kera rongdoka nisung meyrirjang aika pei talidak nungi ainshitsü totuyuba agütsü aser anüng mokozü agi nembanga akum.


Los Angeles north tsütsü kilometre 80 shi pilar Castaic Lake area nung Bodhbarnü Hughes Fire adokba ajanga iba tesem nung alirtem ainshitsü totuyuba agütsü ta mibener temi ashi.

Castaic Lake temeket nung tenemkong tila nung süngdong aser arem rongdokba anasa nisung 18,600 shi alir.

Los Angeles County Sheriff's Department nungi Robert Jensen-i mi agi kongshia aliba tesem nung alir ajunga dang tekeraba nung ainshitsü aser Los Angelens nung Eaton aser Palisades nung atalokba ama kasa tia majurutsü ayongzük, kong nisung 28 asü aser nisung meyrirjang aika talidak ki maka akum.

IMPUR CHRISTIAN HOSPITAL
P.o : Impur-798615, Dist : Mokokchung : Nagaland

APPRECIATION



Impur Christian Hospital (ICH) deeply appreciate the generous donation by Hon'ble Minister RD & SIRD Shri. Metsubo Jamir for upgradation of the Impur Diagnostic Center, Mokokchung with Equipment and Furnishing. The upgraded modernized Diagnostic Center will be a blessing to the Medical Services and the Community. It is our prayer that Almighty God will abundantly bless our Leader.
(Dr. S.S Aka Longchar)
M.S. ICH s

YIMJUNG AKANGSHITEPBA

Mopungchuket aser Longjang nüburtem tsüngda yimjung akangshitepba sentong Longjang Baptist Arogo nung 30th November, 2024 anogo nung takok aser temoatsü ngua agiogo.

Yimnasanger tsüngda nung meteta aser memeteti O aser mapa ajanga inyakbatem; koba ajanga küm aika nüburtem temulung kurema lia arur, iba asoshi tatok meshiba den yimjung yanglua tarutsü anogotem asoshi Tsüngrem nungi temoatsü meshia **Mopungchuket Arogo aser Yimden den Longjang Arogo aser Yimden** külemi sentong tajung agiba sangdonger.


Akumjungba
Council Chairman
Mopungchuket Village Council
Council Chairman
Mopungchuket Village


S. Imti Lcr.
Council Chairman
Longjang Village Council
Chairman
Longjang Village Council
Impur, Mokokchung, Nagaland

ASTD-I DABA DANGI ZÜLUBA SHITI SOCIAL MEDIA AJANGA O-INTEPBA INDANG RATET YAMAI AYIMOKTSÜR

- (i) ASTD kübok nütsüng nübur aser lokti tentet ajak ASTD temzüng ozüng agi alenbanga lir aser tang DABA nung senotsü tim mesüi amshiba lokti-i puteta yimjak nung atashia jempiogo. Tanü tensa iba ama mapa Govt. mesüra yimden aser lokti kar nung atalok asübo idangyongjisa mapa nungi anentsür case file süa (FIR) tapet temerenshi inyakla. Saka arogo asüyongji yimlisüa arogo nung mintoki ano par mapa nung mena lir. Iba yongji ASTD arogo inyakyim tasenba shitak inyaka bener aotsü asoshi tekumdangtsü-o ASTD sanen luden ternemba DABA dangi yok. Anunngi iba ken-o nung ASTD-i arogo inyakyim nung teka amuokba kecha mali, kechiyong arogo inti mungdang-i lemtetba nung ASTD nenshiba dang.
- (ii) DABA indang sen ya nübur sen aser iba temeden ya DABA nung aliba züngsem ajak-i ola adoka jembir. Tanü asen tendak Tsüngrem tenüng nung tai atokba ajanga mapa tamajung inyaker/auer ajungshir aser arogo nung sen Crore aika samaba tai atoktsüla ta jembiba angazük nung ASTD office ajanga poisa kata matoktsü ta yimyim ayim. Tanü DABA senotsü samaba ken-o nung taitok agütsüra asüng asen Ao arogotem aika nung sen samatsü aser tai atoktsüsa akumtsü.
- (iii) DABA inti mungdang ajanga auer dang sen bener arutsü atema ita terok mapang agüja lir, aser iba ken-o kodang tembangdir ASTD temzüng nung aliba ama tapet temerenshi agütsütsü ta aliba nenshia metetdaksüba lir.
- (iv) DABA nung senotsü samaba osang angashia ASTD-i arok khuret ta angatet nung tongpo aputeptsü mechi 8th Oct 2024 nung DABA Board of Deacon temden mensem ka mena shisa lemsateptsü ayongtep, saka Pastor office nungi iba mensem nung DABA Deacon Board marutsü saka DABA inti ket nung telemtetba agitettsü lenmang lir ta 11th Oct 2024 nung shiti ajanga langzü.
- (v) ASTD-i DABA ya Aor arogo ta angatet nung Social Media/Print Media balala nung sen auyaba/samaba osang mejungi-zülutepba ngua DABA aser Aor inti maksü ta bilem nung 7th Oct 2024 anogo nung Tir Yimyim osang kakat ajanga DABA nung atalokba ken-o tatembang kati maru tashi shingaia Social Media nung shilem magitsü ASTD inyakbaji arogo anema inyakba asü kumzüka ayutsü inyak ta angateter?

Temalen agüja aliba kuli tem nung temulung masü mesüra mangatetba lira Social Media platform nung masü saka ASTD office-i arua angatetteptsü metetdaksür. Iba dak alaka kar-i danga social media, Print Media, Digital nung ASTD tenüng menükja zülura ASTD-i tatem tashi bushitsü ta ayimoktsür.

Sd/-
Ningsangwaba Pongen
President ASTD

Sd/-
K. Tsukti Longchar
General Secretary ASTD

Sabalenka aser Keys na final asayatsü



AUSTRALIAN OPEN

Aenjeti/January 23, 2025 (Agencies): Brehostibarnü Rod Laver Arena nung Australia Open tetsür kija asaya mezüngbuba semifinal nung Aryna Sabalenka-i Paula Badosa koka final-i iogo.

Arishi küm 26 tain Sabalenka-i semifinal asaya nung Spain tsür Badosa ya 6-4, 6-2 agi ayong ayonga koka liasü.

Sabalenka-i taoba küm ana Australia Open koka lir aser

taküm agi küm asembuba iba asayamung akoktsü atema merangdar aser iba nukjidong atongtsü atema asaya ka dang akoktsü nüngdaka lir.

"Medemer ka den kanga toktepa asayaogo. Takok anguba atema kanga pelar," ta Belarus tsürla yagi ashi.

"Ni kanga nema adanger. Kü tenüing puti otsü kaket nung züngoksemra kanga pelatsü," ta laisa shisem.

Iba asaya akokba ya Sabalenka asoshi Australian Open nung asaya 20buba atonga akokba asaya liasü.

Quarter-final nung Badosa-i third seed America tsür Coco Gauff akok, saka semifinal asaya nung Sabalenka ya la asoshi kanga jungrara liasü.

Brehostibarnüsa Rod Laver Arena nung tetsür kija asaya tanga semifinal ka nung Madison Keys-i Iga Swiatek koka final tongtetogo.

America tsürla yagi kanga meranga asayar iba asaya ya 5-7, 6-1, 7(10)-6(8) agi koka final-i iogo, kong la iba asayamung defending champion Aryna Sabalenka den asayatsü.

Australian Cricket Hall of Fame nung Clarke züngoksemogo

Aenjeti/January 23, 2025 (Agencies): World Cup koker aliba taoba mapang Australia cricket team captain Michael Clarke Australian Cricket Hall of Fame nung züngoksema pa ya züngsem 64buba kümogo, ta linük cricket governing body-i Brehostibarnü metetdaksü.

Induction ceremony ya Bodhbarnü Sydney Cricket Ground nung agia liasü.

"Test asaya nung run 8600 dak tema, century 28 aser cricket asayatem rongnungi pa kijai SCG nung Test triple-century yanglua lir.

"Taoba Australia captain Michael Clarke AO nem Australian Cricket Hall of Fame nung züngoksema atema tenüingsang agütsür," ta Cricket Australia-i X nung zülutsü.

Küm 12 asayaba mapang Clarke-i Test aser ODI asaya nung run 8643 aser 7981 yanglu aser pa indang average 49.10 aser 44.58 liasü

Sydney Cricket Ground nung pai century 28 yanglu, kong India den asayaba mapang run 329 yangluba densema lir.

Pa England den Test asaya 35 aser India den Test asaya 22 nung asayaogo aser pai alima nung team tajungtiba ana den ya asayaba mapang century tenetnet yangluogo.

2015 küm ODI World Cup akokba aser 2013 aser 2014 küm Ashes 5-0 agi akokba mapang arishi küm 43 tain ya Australia team captain liasü.

"Asayar tajung, idols, ina atuba mapang nukrangdong aika rongnung züngoksema ya



tetushi tulu lir," ta Clarke-i SCG nung induction ceremony mapa ashi.

Iba den bendenloksema 2014 küm domestic asaya ka asayaba mapang opener Phil Hughes asüba sülen Clarke-i team kanga junga aniba atema pa nem tenüingsang agüja liasü.

Tena ya tembar tajung liasü aser kidang New South Wales nung külemi asaya liasü.

Sydney nung Sheffield Shield asaya ka nung Hughes tekong nung ball agi ona asüba mapang Clarke ya Australian captain liasü.

Iba sülen anogo ishika lir India den Adelaide nung Test asayaba mapang pai pa indang Test century 28buba yanglua Hughes nem bendanga agüja liasü. 2015 küm England den Ashes asayamung asayaba sülen Clarke-i pa cricket asaya nungi anisüngzükba sangdonga liasü.

Manchester City-i Marmoush alizükogo

Aenjeti/January 23, 2024 (Agencies): Manchester City-i, Egypt nunger forward Marmoush Eintracht Frankfurt nungi alizüka küm pezüser tesadang atema tenangzüktepba yangluba Brehostibarnü metetdaksüogo.

Marmoush ya Europe nung lanur forward tajungtiba rongnung ka lir aser pa ya attacking unit nung Erling Haaland nem teyari agütsütsü atema alizükogo.

Egypt nunger asayar yagi Argentina nunger asayar Julian Alvarez melentsü imlar, shiba taoba küm August ita Atletico Madrid-i pound million 81 agi alizükogo.

Marmoush-i tawa kanga junga asaya arudar aser tang asaya aliba Bundesliga season nung Frankfurt nungi asayaba

mapang pai goal 15 idaktsür lir aser pai Bayern Munich nungi asayar Harry Kane dang nungi goal ka agi dang ishiba idaktsür lir.

"Iba anogo ya ni kodanga mamatoktsü," Marmoush-i ashi.

"Manchester City amala alima nung team tajungtiba rongnung ka den tenangzüktepba yangluba atema jangradema bilemer. Ni kanga pelar aser ozü kinungertema kanga nema adanger aser onok ajak Manchester-i aruba atema kanga pelar.

"Pep den pa indang technical staff aser idaki world-class facilities lir asünung asayar ka renloka aotsü asoshi ajak lir. Ni takok marok kokerner aji nonga ta meshitettsü. City ya küm aika England nung takok tajungtiba anguba club lir aser ni takoker rongnung adener ta meteta lir.

Ni staff aser külem asayatem nungi angazükner aser ni iba takoker team nung tongtibang züngsem ka kümner," ta pai ashi.

Marmoush ya Egypt national team nungi 35 ben asayaogo. Pa arishi küm 17 asüba mapang 2016 küm mezüngbuba Wadi Degla nungi professional asaya asaya-a liasü.

Wadi nungi 17 ben asayaba sülen Marmoush ya 2017 küm Europe ao aser Vf Wolfsburg nung aden aser iba sülen 2023 küm Eintracht Frankfurt-i oa liasü.

Pep Guardiola-i aniba City team-i taküm junga masayateti arudar aser parnok tang PL nung point 38 ngua pongububa nung lir aser temaba jenjang nung aliba Liverpool team point 12 agi memenepli lir.



ICC Test rankings: Jasprit Bumrah maneni temaba jenjang nung lir

Aenjeti/January 23, 2024 (Agencies): Australia nung Border Gavaskar Trophy (BGT) nung 'Player of the Series' naroküm ngua kanga junga asayaba sülen India nunger fast bowler Jasprit Bumrah bowlers tem atema International Cricket Council's (ICC) Test rankings nung maneni temaba jenjang nung lir.

BGT nung wicket 32 agiba sülen pai rating point 907 nguogo, koba tang tashi nung India nunger bowler kati rating point timtiba anguba asütsü aser tang sayaba rankings nung ano pa point ka agi timba küm 908 kümogo.

Australia nunger asayar

Pat Cummins (841) tanabuba jenjang nung aser South Africa nunger asayar Kagiso Rabada (837) tasembuba jenjang nung lir.

Pakistan nunger bowler Noman Ali-i (761) West Indies den Multan nung mezüngbuba test asaya nung wicket trok agiba sülen pa top-10-i iogo.

Test all-rounders' top-10 list memelenshi lir aser Ravindra Jadeja (400 ratings points) maneni temaba jenjang nung lir. Pa sülen South Africa nunger Marco Jansen (294) aser Bangladesh nunger Mehidy Hasan (263) na tanabuba aser tasembuba jenjang nung lir.

BILEMDANGANG

"Shisaliokji tashi lir."